



Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaanni nr. 9, 3. december 2012-imeersumi nalikillilersuinernut maleruagassat kingullermik allanngortinnerisigut aningaasaqarnikkut kingunerisassai pillugit kingusinnerpaamik UKA2016-imut atatillugu saqqummiunneqartussamik nalunaarusiornissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarusiornikkut takutinneqassaaq allannguuteqarneq ingerlatsiveqarfinnut mikinerusunut akunnattumillu angissusilinnut aningaasaqarnikkut kinguneqarsimanersoq. Taamatuttaaq nalunaarusiami ingerlatseqatigiiffiit atortussanik nutaanik aningaasaliiffigisaminnillu nalikillilersuinnaanerat siunertaralugu aningaasatigut kingunerisat nalilersuinernik imaqartinneqassaaq.

(Inatsisartunut ilaasortaq Agathe Fontain, Inuit Ataqatigiit)
(Siullermeenera)

Isertussangilarput Demokraatini nalikilliinissamut malittarisassat 2012-mi decemberi sioqqullugu iluseqalersillugit allanngortinneqarnissaat illersoratsigu.

Tamatuma saniatigut Demokraatini pingaartillugu sulissutigaarput inuussutissarsiortunut sinaakkutit pitsanngorsarneqassasut, isumaqaratta taamaaliornikkut suliffissanik pilersitsinissamut periarfissaqarnerulissasoq inuiaqatigiinnilu ineriartortitsineq.

Taamaattumik iluarisimaarparput Aningaasaqarnermut Naalakkersuisup ilaatigut Sulisitsisut Peqatigiiffiat suleqatigalugu suligasuartussamik suleqatigiisitaliornikummat, misissuisussanik inuussutissarsiornermut sammisunik inatsisinik akileraartarneq akitsuutillu eqqarsaatigalugit tamatumalu kingorna tigussaasumik siunnersuusiorlutik qinigassanik imaqartussamik. Suleqatigiisitat siunnersuutaasa saqqummiunnissaat qilanaarluta utaqqivarput.

Uani siunnersuummi pineqarpoq nassuiaasiortoqarnissaaq paasiniaarlugu nalikilliliisarnermut malittarisassat kingullermik allanngortinnerisa aningaasatigut kinguneri. Demokraatini isumaqarpugut, pineqartoq tamanna suleqatigiisitaliaasimasup ilanngullugu sularisinnaakuttoora.

Taama paasinnilluta siunnersuutip Aningaasaqarnermut Akileraartarnermullu Ataatsimiititaliami suliareqqinneqarnissaa innersuussutigaarput.